


佛所行讚經

卷四  
之五

典

五四





佛所行讚經卷第四

馬 鳴

菩 其

薩 日 自 撰 跋

北涼天竺三藏曇無讖譯

餅沙王諸弟子品第十六

時彼五比丘 阿濕波誓等 聞彼知法聲

慨然而自傷 合掌而加敬 仰瞻於尊顏

如來善方便 次令入正法 前後五比丘

得道調諸根 猶五星麗天 列侍於明月

時彼鳩夷城 長者子耶舍 夜眠忽覺悟

自見其眷屬 男女裸身卧 卽生厭離心

4704

念此煩惱本 誑惑於愚夫 嚴服瓔珞

出家詣山林 尋路而並唱 惱亂惱亂

如來夜經行 聞唱惱亂聲 卽命汝善來

此有安隱處 涅槃極清涼 寂滅離諸惱

耶舍聞佛教 心中大歡喜 乘本厭離心

聖慧泠然開 如入清涼池 肅然至佛所

其身猶俗容 心已得漏盡 宿植善根力

疾成羅漢果 淨智理潛明 聞法能卽悟

猶如鮮素繒 易爲染其色 彼已自覺知

所應作已作 願身猶莊嚴 而生慚愧心

如來知彼念 而爲說偈言 嚴飾以瓔珞

心調伏諸根 平等觀眾生 行法不計形

身被出家衣 其心累未忘 處林貪世榮

是則爲俗人 形雖表俗儀 心棲高勝境

在家同山林 則離於我所 縛解存於心

形豈有定相 佩甲衣重袍 謂能制強敵

改形著染衣 爲伏煩惱怨 卽命比丘來

應聲俗容變 具足出家儀 皆成於沙門

先有俗遊朋 其數五十四 尋善友出家

隨次入正法 斯由宿善業 妙果成於今

純灰洽已久 經水速鮮明 上行諸聲聞  
六十阿羅漢 悉如羅漢法 隨順而教誡  
汝今已濟度 生死河彼岸 所作已畢竟  
堪受一切供 各應遊諸國 度諸未度者  
眾生苦熾然 各無救護者 汝等各獨遊  
哀愍而攝受 吾今亦獨行 還彼伽闍山  
彼有大仙人 王仙及梵仙 悉皆在於彼  
舉世之所宗 迦葉苦行仙 國人悉奉事  
受學者甚眾 我今往度之 時六十比丘  
奉教廣宣法 各從其宿緣 隨意詣諸方

世尊獨遊步 往詣伽闍山 入空靜法林  
詣迦葉仙人 彼有事火窟 惡龍之所居  
山林極清曠 處處無不安 世尊爲教化  
告彼而請宿 迦葉白佛言 無有宿止處  
惟有事火窟 善清淨可居 而有惡龍止  
必能傷害人 佛言但見與 且一宿止住  
迦葉種種難 世尊請不已 迦葉復白佛  
心不欲相與 謂我有悋惜 且自隨所樂  
佛卽入火室 端坐正思惟 時惡龍見佛  
瞋恚縱毒火 舉室洞熾然 而不觸佛身

舍盡火自滅	世尊猶安坐	猶如劫火起
梵天宮洞然	梵王正其坐	不恐亦不畏
惡龍見世尊	光顏無異相	毒息善心生
稽首而歸依	迦葉夜見光	歎嗚呼怪哉
如此道德人	而為龍火燒	迦葉及眷屬
晨朝悉來看	佛已降惡龍	置在於鉢中
彼知佛功德	而生奇特想	憍慢久習故
猶言我道尊	佛以隨時宜	現種種神變
察其心所念	變化而應之	令彼心柔輒
堪為正法器	自知其道淺	不及於世尊

決定謙下心	隨順受正法	鬱毗羅迦葉
弟子五百人	隨師善調伏	次第受正法
迦葉并徒眾	悉受正化已	仙人資生物
并諸事火具	悉棄於水中	漂沒隨流遷
那提伽闍等	二弟居下流	見被服諸物
隨流而亂下	謂其遭大變	憂怖不自安
二眾五百人	尋江而求兄	見兄已出家
諸弟子亦然	知得未曾法	而起奇特想
兄今已伏道	我等亦當隨	彼兄弟三人
及弟子眷屬	世尊為說法	即以事火譬

愚癡黑烟起 亂想鑽燧生 貪欲瞋恚火

焚燒於眾生 如是煩惱火 熾然不休息

彌綸於生死 苦火亦常然 能見二種火

熾然無依怙 云何有心人 而不生厭離

厭離除貪欲 貪盡得解脫 若已得解脫

解脫知見生 觀察生死流 而舉於梵行

一切作已作 更不受後有 如是干比丘

聞世尊說法 諸漏永不起 一切心解脫

佛為迦葉等 干比丘說法 所作者已作

淨慧妙莊嚴 諸功德眷屬 施戒淨諸根

大德仙從道 苦行林失榮 如人失戒德

空身而徒生 世尊大眷屬 進詣王舍城

憶念摩竭王 先所修要誓 世尊既已至

止住於杖林 餅沙王聞之 與大眷屬俱

舉國士女從 往詣世尊所 遠見如來坐

降心伏諸根 除去諸俗容 下車而步進

猶如天帝釋 往詣梵天王 前頂禮佛足

敬問體安和 佛還慰勞畢 命令一面坐

時王心默念 釋迦大威力 勝德迦葉等

今皆為弟子 佛知眾心念 而問於迦葉

汝見何福利 而棄事火法 迦葉聞佛命  
驚起大眾前 胡跪而合掌 高聲白佛言  
修福事火神 果報悉輪迴 生死煩惱增  
是故我棄捨 精勤奉事火 爲求五欲境  
愛欲增無窮 是故我棄捨 事火修呪術  
離解脫受生 受生爲苦本 故捨更求安  
我本謂苦行 祠祀設大會 爲最第一勝  
而更違正道 是故今棄捨 更求勝寂滅  
離生老病死 無盡清涼處 以知此義故  
放捨事火法 世尊聞迦葉 說自知見事

欲令諸世間 普生淨信心 而告迦葉言  
汝大士善來 分別種種法 而從於勝道  
今於大眾前 顯汝勝功德 如巨富長者  
開現於寶藏 令貧苦眾生 增其厭離心  
善哉奉尊教 卽於大眾前 斂身入正受  
飄然昇虛空 經行住坐卧 或舉身洞然  
左右出水火 不燒亦不濕 從身出雲雨  
雷電動天地 舉世悉瞻仰 縱目觀無厭  
異口而同音 稱歎未會有 然後攝神通  
敬禮世尊足 佛爲我大師 我爲尊弟子

奉教聞斯行	所作已畢竟	舉世普見彼
迦葉為弟子	決定知世尊	真實一切智
佛知諸會眾	堪為受法器	而告餅沙王
汝今善諦聽	心意及諸根	斯皆生滅法
了知生滅過	是則平等觀	如是平等觀
是則為知身	知身生滅法	無取亦無受
知身諸根覺	無我無我所	純一苦積聚
苦生而苦滅	已知諸身相	無我無我所
是則之第一	無盡清淨處	我見等煩惱
繫縛諸世間	既見無我所	諸縛悉解脫

不實見所縛	見實則解脫	世間攝受我
則為邪攝受	若彼有我者	或常或無常
生死二邊見	其過最尤甚	若使無常者
修行則無果	亦不受後有	無功而解脫
若使有常者	無死生中間	則應同虛空
無生亦無滅	若使有我者	則應一切同
一切皆有我	無業果自成	若有我作者
不應苦修行	彼有自在主	何須造作為
若我則有常	理不容變異	見有苦樂相
云何言有常	知生則解脫	遠離諸塵垢



一切悉有常	何用解脫為	無我不惟言
理實無實性	不見我作事	云何說我作
我既無所作	亦無作我者	無此二事故
眞實無有我	無作者知者	無主而常還
生死日夜流	汝今聽我說	六根六境界
因緣六識生	三事會生觸	心念業隨轉
陽珠遇乾草	緣日火隨生	諸根境界識
士夫生亦然	芽因種子生	種非卽是芽
不卽亦不異	眾生亦然	世尊說眞實
平等第一義	王眷屬人民	餅沙王歡喜

離垢法眼生 百千諸鬼神 聞說甘露法  
亦隨離諸塵

大弟子出家品第十七

爾時餅沙王 稽首請世尊 遷住於竹林

哀受故默然 王已見眞諦 奉拜而還宮

世尊與大眾 徙居安竹園 爲度眾生故

建立慧燈明 以梵住天住 賢聖住而住

時阿濕波誓 調心御諸根 時至行乞食

入於王舍城 容貌世挺特 威儀諦安詳

城中諸士女 見者莫不歡 行者爲住步

前迎後風馳 迦毗羅仙人 廣度諸弟子  
第一勝多聞 其名舍利弗 見比丘庠序  
閑雅淨諸根 踟躕而待至 舉手請問言  
年少淨容儀 我所未曾見 得何勝妙法  
爲宗事何師 師教何所說 願告決所疑  
比丘欣彼問 和顏遜辭答 一切智具足  
甘蔗勝族生 天人中最勝 是則我大師  
我年旣幼稚 學日又初淺 豈能宣大師  
甚深微妙義 今當以淺智 略說師教法  
一切有法生 皆從因緣起 生滅法悉滅

說道爲方便 二生優波提 隨聽心內融  
遠離諸塵垢 清淨法眼生 先所修決定  
知因及無因 一切無所作 皆由自在天  
今聞因緣法 無我智開明 增微諸煩惱  
無能究竟除 惟有如來教 永盡而無遺  
非攝受我所 而能離吾我 明因日燈興  
孰能令無光 如斷蓮華莖 微絲猶連綿  
佛教除煩惱 猶斷石無餘 敬禮比丘足  
退辭而還家 比丘乞食已 亦還歸竹園  
舍利弗還家 貌色甚和雅 善友尊目連

同體聞才均	遙見舍利弗	顏儀甚熙怡
告言今見汝	而有異常容	素性至沉隱
歡相現於今	必得甘露法	此相非無因
荅言如來告	實獲未曾法	卽請而爲說
聞則心開解	諸塵垢亦除	隨生正法眼
久植妙因果	如觀掌中燈	得佛不動信
俱行詣佛所	與徒眾弟子	二百五十人
佛遙見二賢	而告諸眾言	彼來者二人
吾上首弟子	一智慧無雙	二神足第一
以深淨梵音	卽命汝善來	此有清淨法

出家究竟道	手執三奇杖	縈髮持澡餅
聞佛善來聲	卽變成沙門	二師及弟子
悉成比丘儀	稽首世尊足	卻坐於一面
隨順爲說法	皆得羅漢道	爾時有二士
迦葉施明燈	多聞身相具	財盈妻極賢
厭捨而出家	志求解脫道	路由多子塔
忽遇釋迦文	光儀顯明耀	猶若祠天幢
肅然舉身敬	稽首頂禮足	尊爲我大師
我是尊弟子	久遠積癡冥	願爲作燈明
佛知彼三士	心樂崇解脫	清淨和輓音

命之以善來 聞命心融泰 形神疲勞息

心棲勝解脫 寂靜離諸塵 大悲隨所應

略為其解說 頓解諸深法 成四無礙辯

大德普流聞 故名大迦葉 本見身我異

或見我即身 有我及我所 斯見已永除

惟見眾苦聚 離苦則無餘 持戒修苦行

非因而見因 平等見苦性 永無他取心

若有若見無 二見生猶豫 平等見真諦

決定無復疑 深著於財色 迷醉貪欲生

無常不淨想 貪愛永已乖 慈心平等念

怨親無異想 哀愍於一切 則銷瞋恚毒

依色諸有對 種種雜想生 思惟壞色想

能斷於色愛 雖生無色天 命亦要之盡

愚於四正受 而生解脫想 寂滅離諸想

無色貪永除 動亂心變逆 猶狂風鼓浪

深入堅固定 寂止掉亂心 觀法無我所

生滅不堅固 不見輒中上 我慢心自忘

外餘 熾然智慧燈 離諸癡冥闇 見盡無盡法

無明悉無餘 思惟十功德 十種煩惱滅

蘇息作已作 深感仰尊顏 離三而得三

三弟子除三 猶三星列布 於三十三天  
列侍於三五 三侍佛亦然

化給孤獨品第十八

時有大長者 名曰給孤獨 巨富財無量  
廣施濟貧乏 遠從於北方 憍薩羅國來  
止一知識舍 主人名首羅 聞佛與於世  
近住於竹林 承名重其德 卽夜詣彼林  
如來已知彼 根熟淨信生 隨宜稱其實  
而為說法言 汝已樂正法 淨信心虛渴  
能滅於睡眠 而來敬禮我 今日當為汝

具設初賓儀 汝宿植德本 堅固淨希望  
聞佛名歡喜 堪為正法器 虛懷廣行惠  
周給於貧窮 名德普流聞 果成由宿因  
今當行法施 至心精誠施 時施寂靜施  
兼受持淨戒 戒為莊嚴具 能轉於惡趣  
令人上昇天 報以天五樂 諸求為大苦  
愛欲集諸過 當修遠離德 離欲寂靜樂  
知老病死苦 世間之大患 正觀察世間  
離生老病死 既見於人間 有老病死苦  
主天亦復然 無有常存者 無常則是苦

苦則無有我	無常苦非我	何有我我所
知苦卽是苦	集者則爲集	苦滅卽寂靜
道卽安隱處	羣生流動性	當知是苦本
厭末塞其源	不願有非有	生老死盛火
世間普熾然	見生死動搖	當習於無想
三摩提究竟	甘露寂靜處	空無我我所
世間悉如幻	當觀於此身	諸大眾行聚
長者聞說法	卽得於初果	生死海銷滅
惟有一滴餘	空閑修離欲	第一有無身
不如今俗人	見諦眞解脫	不離諸行苦

種種異見網	雖至第一有	不見眞實義
邪想著天福	有愛縛轉深	長者聞說法
陰蓋煥然開	遂得於正見	諸邪見永除
猶如秋厲風	飄散於重雲	不計自在因
亦非邪因生	亦復非無因	而生於世間
若自在天生	無長幼先後	亦無五道輪
生者不應滅	亦不應災患	爲惡亦非過
淨與不淨業	斯由自在天	若自在天生
世間不應疑	如子從父生	孰不識其尊
人遭窮苦時	不應反怨天	悉應宗自在

不應奉餘神 自在是作者 不應名自在  
以其是作故 彼則應常作 常作則自勞  
何名爲自在 若無心而作 如嬰兒所爲  
常有心而作 有心非自在 苦樂由眾生  
則非自在作 自在生苦樂 彼應有愛憎  
已有愛憎故 不應稱自在 若復自在作  
眾生應默然 任彼自在力 何用修善爲  
正復修善惡 不應有業報 自在若業生  
一切則共業 若是共業者 皆應稱自在  
自在若無因 一切亦應無 若因餘自在

自在應無窮 是故諸眾生 悉無有作者  
當知自在義 於此論則壞 一切義相違  
無說則有過 若復自性生 其過亦如彼  
諸明因論者 未曾如是說 無所依無因  
而能有所作 彼彼皆由因 猶如依種子  
是故知一切 則非自性生 一切諸所作  
非惟一因生 而說一自性 是故則非因  
若言彼自性 周滿一切處 若周滿一切  
亦無能所作 既無能所作 是則非爲因  
若徧一切處 一切有作者 是則一切時

常應有所作	若言常作者	無待時生物
是故應當知	非自性為因	又說彼自性
離一切求那	一切所作事	亦應離求那
一切諸世間	悉見有求那	是故知自性
亦復非為因	若說彼自性	異於求那者
以常為因故	其性不應異	眾生求那異
故自性非因	自性若常者	事亦不應壞
以自性為因	因果理應同	世間見壞故
當知彼有因	若彼自性因	不應求解脫
以有自性故	應任彼生滅	假令得解脫

自性還生縛	若自性不見	為見法因者
此亦非為因	因果理殊故	世間諸見事
因果悉俱見	若自性無心	不應有心因
如見烟知火	因果類相求	非彼因不見
而生於見事	猶金造器服	始終不離金
自性是事因	始終豈得殊	若使時作者
不應求解脫	以彼時常故	應任彼時節
世間無有邊	時節亦復然	是故修行者
不應方便求	陀羅驃求那	世間一異論
雖有種種說	當知非一因	若說我作者



應隨欲而生 而今不隨欲 云何說我作  
不欲而更得 欲者反更違 苦樂不自在  
云何言我作 若使我作者 應無惡趣業  
種種業果生 故知非我作 言我隨時作  
時應惟作善 善惡隨緣生 故知非我作  
若使無因作 不應修方便 一切自然定  
修因何所爲 世間種種業 而獲種種果  
是故知一切 非爲無因作 有心及無心  
悉從因緣起 世間一切法 非無因生者  
長者心開解 通達勝妙義 一相實智生

決定了真諦 敬禮世尊足 合掌而啓請  
居在舍婆提 土地豐安樂 波斯匿大王  
師子元族胄 福德名稱流 遠近所宗敬  
欲造立精舍 惟願哀愍受 知佛心平等  
所居不求安 愍彼眾生故 不違我所請  
佛知長者心 大施發於今 無染無所著  
善護眾生心 汝已見真諦 素心好行施  
錢財非常寶 宜應速爲施 如庫藏被燒  
已出者爲珍 明人知無常 出財廣行惠  
慳貪者守惜 恐盡不受用 亦不畏無常

徒失增憂悔	應時應器施	如健夫臨敵
能施而能戰	是則勇慧士	施者眾所愛
善稱廣流聞	良善樂為友	命終心常歡
無悔亦無怖	不生餓鬼趣	此則為華報
其果難思議	輪迴六趣中	良伴無過施
若生天人中	為眾所奉事	生於畜生道
施報隨受樂	智慧修寂定	無依無有數
雖獲甘露道	猶資施以成	緣彼惠施故
修八大人念	隨念歡喜心	決定三摩提
三昧增智慧	能正觀生滅	正觀生滅已

次第得解脫	捨財惠施者	蠲除於貪著
慈悲恭敬與	兼除嫉恚慢	明見惠施果
無施癡見除	諸結煩惱滅	斯由於惠施
當知惠施者	則為解脫因	猶如人種栽
為蔭華果故	布施亦如是	報樂大涅槃
不堅固財施	獲報堅固果	施食惟得力
施衣得好色	若建立精舍	眾果具足成
或施求五欲	或貪求大財	或為名聞施
有求生天樂	或為免貧苦	惟汝無想施
施中之最上	無利而不獲	汝心有所弘

宜令速成就 癡愛心來遊 清淨眼開還  
長者受佛教 惠心轉增明 請優波提舍  
賢友而同歸 還彼憍薩羅 周行擇良墟  
見太子祇園 林流極清閑 往詣太子所  
請求買其田 太子甚寶惜 元無出賣心  
設布黃金滿 猶尙地不遷 長者心歡喜  
卽徧布黃金 祇言我不與 汝云何布金  
長者言不與 何言滿黃金 二人共諍訟  
延及斷事官 眾皆歎奇特 祇亦知其誠  
廣問其因緣 辭言立精舍 供養於如來

并及比丘僧 太子聞佛名 其心卽開悟  
惟取其半金 求和同建立 汝地我樹林  
共以供養佛 長者地祇林 以付舍利弗  
經始立精舍 晝夜勤速成 高顯勝莊嚴  
猶四天王宮 隨法順道宜 稱如來所應  
世間未曾有 增輝舍衛城 如來現神蔭  
眾聖集安居 無侍者哀降 有侍資道宜  
長者乘斯福 壽盡上昇天 子孫繼基業  
歷世種福田

父子相見品第十九

佛於摩竭國 化種種異道 悉從一味法  
如日映眾星 出彼五山城 與千弟子俱  
前後眷屬從 往詣尼金山 近迦維羅衛  
而生報恩心 當修法供養 以奉於父王  
王師及大臣 先遣伺候人 當尋從左右  
瞻察其進止 知佛欲還國 驅馳而先白  
太子遠遊學 願滿今來還 王聞大歡喜  
嚴駕卽出迎 舉國諸士庶 悉皆從王行  
漸近遙見佛 光相倍昔容 處於大眾中  
猶如梵天王 下車而徐進 恐爲法留難

瞻顏內欣踴 口莫知所言 顧貪居俗累

子超然登仙 雖子居道尊 未知稱何名

自惟久思渴 今日無由宣 子今默然坐

安隱不改容 久別無感情 令我心獨悲

如人久虛渴 路逢清冷泉 奔馳而欲飲

臨泉忽枯竭 今我見其子 猶是本先顏

心疎氣高絕 都無蔭流心 抑情虛妄斷

如渴對枯泉 未見繁想馳 對目則無歡

如人念離親 忽見畫形像 應王四天下

猶若曼陀王 汝今行乞食 斯道何足榮

安靜如須彌	光相如日明	詳行牛王步
無畏師子吼	不受四天封	乞食而養身
佛知父王心	猶存於子想	為開其心故
并哀一切眾	神足昇虛空	兩手捧日月
遊行於空中	作種種變異	或分身無量
還復合為一	或履水如地	或入地如水
石壁不礙身	左右出水火	父王大歡喜
父子情悉除	空中蓮華坐	而為王說法
知王心慈念	為子增憂悲	纏綿愛念子
宜應速除滅	息愛靜其心	受我子養法

人子所未奉	今以奉父王	父未從子得
今從子得之	人王之奇特	天王亦希有
勝妙甘露道	今以奉大王	自業業受生
業依業果報	當知業因果	勤習度世業
諦觀於世間	惟業為良朋	親戚及與身
深愛相戀慕	命絕神獨往	惟業良友隨
輪迴於五趣	三業三種生	愛欲為其因
種種類差別	今當竭其力	淨修身口業
晝夜勤修習	息亂心寂然	惟此為已利
離此悉非我	當知三界有	猶如海濤波



難樂難習近 當修第四業 生死五道輪

猶眾星旋轉 諸天亦遷變 人中豈得常

涅槃為最安 禪寂樂中勝 人王五欲樂

危險多恐怖 猶毒蛇同居 何有須臾歡

明人見世間 如盛火圍繞 恐畏無暫安

永離生老死 無盡寂靜處 慧者之所居

不須利器仗 象馬以車兵 調伏貪恚癡

天下敵無餘 知苦斷苦因 證滅修方便

正覺四真諦 惡趣恐怖除 先現妙神通

令王心歡喜 信樂情已深 堪為正法器

合掌而讚歎 奇哉誓果成 奇哉大苦離

奇哉饒益我 先雖增憂悲 緣悲故獲利

奇哉我今日 生子果報成 宜捨勝妙樂

宜精勤習苦 宜離親族榮 宜割恩愛情

古昔諸仙王 唐苦而無功 清淨安隱處

汝今悉已獲 自安而安彼 大悲濟眾生

若本住世間 為轉輪王者 無自在神通

令我心開解 亦無此妙法 使我今日歡

設為轉輪王 生死緒不絕 今已免生死

輪迴大苦滅 能為眾生類 廣說甘露法

如此妙神通 智慧甚深廣 永滅生死苦

為天人之上 雖居聖王位 終不獲斯利

如是讚歎已 法愛增恭敬 居王父尊位

謙卑稽首禮 國中諸人民 觀佛神通力

聞說深妙法 兼見王敬重 合掌頭面禮

悉生奇特想 厭患居俗累 咸生出家心

釋種諸王子 心悟道果成 悉厭世榮樂

捨親愛出家 阿難陀難陀 金毗阿那律

難陀跋難陀 及軍荼陀那 如是等上首

及餘釋種子 悉從於佛教 受法為弟子

匡國大臣子 優陀夷為首 與諸王子俱

隨次而出家 又阿低黎子 名曰優波離

見彼諸王子 大臣子出家 心感情開解

亦受出家法 父王見其子 神力諸功德

自亦入清流 甘露正法門 捨王位國土

禪定甘露飯 閑居修靜默 處宮習玉仙

如來悉隨攝 本族知識已 道申顏和悅

親戚歡喜隨 時至應乞食 入迦維羅國

城中諸士女 驚起舉聲唱 悉達阿羅陀

學道成而歸 內外轉相告 巨細馳出看

門戶窗牖中	比肩而側目	見佛身相好
光明甚暉曜	外著袈裟衣	身光內徹照
猶如日圓輪	內外相映發	觀者心悲喜
合掌涕淚流	見佛庠序步	斂形攝諸根
妙身顯法義	驚惜增悲歎	剃髮毀形好
身被染色衣	堂堂儀雅容	束身視地行
應戴羽葆蓋	手攬飛龍轡	如何冒遊塵
執鉢而行乞	藝足伏怨敵	貌足姪女歡
華服冠天冠	黎民咸首陽	如何屈茂容
拘心制其形	捨妙欲光服	素身著染衣

見何相何求	舉世五欲怨	捨賢妻愛子
樂獨而孤遊	難哉彼賢妃	長夜抱憂思
而今聞出家	性命猶能全	不審淨飯王
竟見此子不	見其妙相身	毀形而出家
怨家猶痛惜	父見豈能安	愛子羅睺羅
泣涕常悲戀	見無撫慰心	用學此道為
諸明相法者	咸言太子生	具足大人相
應享食四海	觀今之所為	斯則皆虛談
如是比眾多	紛紜而亂說	如來心無著
無欣亦無感	慈悲愍眾生	欲令脫貧苦



增長彼善根	并為當來世	顯其少欲跡
兼除俗塵霧	入貧里乞食	精麤任所得
巨細不擇門	滿鉢歸山林	

受祇洹精舍品第二十一

世尊已開化	迦維羅衛人	隨緣度已畢
與大眾俱行	往憍薩羅國	詣波斯匿王
祇洹已莊嚴	堂舍悉周備	流泉相灌注
華果悉敷榮	水陸眾奇鳥	隨類羣和鳴
眾美世無比	若稽羅山宮	給孤獨長者
眷屬尋路迎	散華燒名香	奉請入祇洹

手執金龍餅	躬跣注長水	以祇洹精舍
奉施十方僧	世尊呪願受	鎮國令久安
給孤獨長者	福慶流無窮	時波斯匿王
聞世尊已至	嚴駕出祇洹	敬禮世尊足
卻坐於一面	合掌白佛言	不置卑小國
忽成大吉祥	惡逆多災害	豈能感大人
今得覩聖顏	沐浴飲清化	鄙雖處凡品
蒙聖入勝流	如風拂香林	氣合成重飈
眾鳥集須彌	異色齊金光	得與明人會
蒙蔭而同榮	野夫供仙人	生為三足星

世利皆有盡 聖利永無窮 人王多愆咎

遇聖利常安 佛知王心至 樂法如帝釋

唯有二種著 不能忘財色 知時知心行

而為王說法 惡業卑下士 見善猶知敬

況復自在王 積德乘宿因 遇佛加恭敬

此乃非為難 國素靜民安 非見佛所增

今當略說法 大王且諦聽 受持我所說

見我功德成 命終形神乖 親戚悉別離

惟有善惡業 始終而影隨 當崇法王業

子養於萬民 現世名稱流 命終上昇天

縱清不順法 今苦後無歡 古昔羸馬王

順法受天福 金步王行惡 壽終生惡道

我今為大王 略說善惡法 大要當慈心

觀民猶一子 不迫亦不害 善攝持諸根

捨邪就正路 不自舉下人 結友於苦行

勿習邪見朋 勿恃王威勢 勿聽邪佞言

勿惱諸苦行 莫踰王正典 念佛唯正法

調伏非法者 現為人中上 德惟隆道中

深思無常想 身命念念遷 棲心高勝境

志求清淨信 保茲自在樂 來世增其歡

傳名於曠劫	必報如來恩	如人愛甜果
必種其良栽	有從明入闇	有從闇入明
有闇闇相續	有明明相因	智者捨三品
當學始終明	言惡羣響應	善唱隨者難
無有不作果	作者不敗亡	創業不勤習
至竟莫能為	素不修善因	後致樂無期
既往無息期	是故當修善	自省不為惡
自作自受故	猶四石山合	眾生無逃處
生老病死山	羣生脫無由	惟有行正法
出斯苦重山	世間悉無常	五欲境如電

老死錐鋒端	何應習非法	古昔諸勝王
猶若自在天	勇健志勝虛	暫顯已磨滅
劫火鎔須彌	海水悉枯竭	況身如泡沫
而望久在世	猛風止旋嵐	日光翳須彌
盛火水所銷	有物悉歸滅	此身無常器
長夜苦守護	廣資以財色	放逸而憍慢
死時忽然至	挺直如枯木	明人見斯變
勤修豈睡眠	生死獨搖機	不止會墮落
不習不續樂	苦報者不為	不近不勝友
不學不斷習	學不受有智	受必令無身

有身不染境 染境為大過 雖生無色天

不免時遷變 當學不變身 不變則無過

以有此身故 為眾苦之本 是故諸智者

息本於無身 一切眾生類 斯由欲生苦

是故於欲有 當生厭離心 厭離於欲有

則不受眾苦 雖生色無色 變易為大患

以不寂靜故 況不離於欲 如是觀三界

無常無有生 眾苦常熾然 智者豈願樂

如樹盛火然 眾鳥豈羣集 覺者為明士

離此則無明 此則開覺士 離此則非覺

此則應所作 離此則不應 此則為近宗

離此與理乖 言此殊勝法 非在家所應

此則為非說 法惟在人弘 患熱入冷水

一切得清涼 冥室燈火明 悉觀於五色

修道亦如是 道俗無異方 或山居墮罪

或在家昇仙 癡冥為巨海 邪見為濤波

羣生隨愛流 漂轉莫能渡 智慧為輕舟

堅持三昧正 方便鼓念檝 能濟無知海

時王專心聽 一切智所說 厭薄於俗榮

知王者無歡 如逸醉狂象 醉醒純熟還

時有諸外道 見王信敬佛 咸求於大王

與佛決神通 時王白世尊 願從彼所求

佛即默然許 種種諸異見 五通神仙士

悉來詣佛所 佛即現神力 正基坐空中

普放大光明 如日暉朝陽 外道悉降伏

國民普歸宗 為母說法教 即昇忉利天

三月處天宮 普化諸天人 度母報恩畢

安居時過還 諸天眾羽從 乘於七寶階

下至閻浮提 諸佛常下處 無量諸天人

乘官殿隨送 閻浮提居民 合掌而仰瞻

守財醉象調伏品第二十一

天上教化母 及餘諸天眾 還遊於人中

隨緣而行化 樹提迦耆婆 首羅輪盧那

長者子央伽 及無畏王子 尼瞿屢陀等

尸利掘多迦 尼犍優波離 悉令得解脫

乾陀羅國王 其名弗迦羅 聞說深妙法

捨國而出家 醯茂鉢低鬼 及婆多耆利

於毗富羅山 調伏而受化 波羅延梵志

波沙那山中 半偈微細義 調伏令信樂

他那摩帝村 有鳩吒檀耽 是二生之首

廣殺生祠祀 如來方便化 令其入正道

於毗提訶山 大威德天神 名般遮尸呿

受法入決定 毗紐瑟吒村 化彼難陀母

央伽富黎城 降伏大力神 富那跋陀羅

輸屢那檀陀 兇惡大力龍 國王及後宮

皆悉受正法 以開甘露門 於彼悅栴村

稽那及尸盧 志求生天樂 化令人正道

央隴利摩羅 於彼修佻村 為現神通力

化令及調伏 有大長者子 浮黎耆婆男

守相大富多財錢 如富那跋陀 即於如來前

受化廣行施 於彼跋提村 化彼跋提黎

及與跋陀羅 兄弟二鬼神 毗提訶富黎

有二婆羅門 一名為大壽 二名曰梵壽

論義以降伏 令入於正法 至毗舍離城

化諸羅刹鬼 并離車師子 及諸離車眾

薩遮尼乾子 悉令人正法 阿摩勒迦波

有鬼跋陀羅 及跋陀羅迦 跋陀羅劫摩

又至阿臘山 度鬼阿臘婆 二名鳩摩羅

三訶悉多迦 還至迦闍山 度鬼洹迦那

及針毛夜叉 及其姊妹子 又至波羅奈

化彼迦旃延	然後乘神通	至輸盧波羅
化彼諸商人	多波犍尼劍	受其旃檀堂
妙香流於今	至摩醯波低	度迦毗羅仙
牟尼住於彼	足蹈於石上	千輻雙輪現
終則不磨滅	至婆羅那處	化婆羅那鬼
至摩偷羅國	度鬼竭曇摩	偷羅俱瑟吒
度賴吒波羅	至鞞蘭若村	度諸婆羅門
迦利摩沙村	度薩毗薩深	亦復化於彼
阿耆尼毘舍	復還舍衛國	度彼瞿曇摩
闍帝輸盧那	道迦阿低黎	還僑薩羅國

度外道之師	弗迦羅婆黎	及諸梵志眾
至施多毗迦	寂靜空閑處	度諸外道仙
令入佛仙路	至阿輸闍國	度諸鬼龍眾
至金毗羅國	度二惡龍王	一名金毗羅
二名迦羅迦	又至跋致國	化度夜叉鬼
其名曰毗沙	那鳩羅父母	并及大長者
令信樂正法	至拘睒彌國	化度瞿師羅
及二優婆夷	波闍鬱多羅	伴等優婆夷
眾多次第度	至犍陀羅國	度阿婆羅龍
如是等次第	空行水陸性	皆悉往化度

如日照幽冥	爾時提婆達	見佛德殊勝
內心懷嫉妬	退失諸禪定	造諸惡方便
破壞正法僧	登耆闍崛山	崩石以打佛
石分爲二分	墮於佛左右	於王平直路
放狂醉惡象	震吼若雷霆	勇氣奮成雲
颺颺而奔走	逸越如暴風	鼻牙尾四足
觸則莫不摧	王舍城巷路	狼藉殺傷人
橫屍而布路	髓腦血流離	一切諸士女
恐怖不出門	合城悉戰悚	但聞驚喚聲
有出城馳走	有窟穴自藏	如來眾五百

時至而入城	高閣窓牖人	啓佛令勿行
如來心安泰	怡然無懼容	惟念貪嫉苦
慈心欲令安	天龍眾營從	漸至狂象所
諸比丘逃避	惟與阿難俱	猶法種種相
一自性不移	醉象奮狂怒	見佛心即醒
投身禮佛足	猶如太山崩	蓮華掌摩頂
如月照烏雲	跪伏佛足下	而爲說法言
象莫害大龍	象與龍戰難	象欲害大龍
終不生善趣	貪恚癡迷醉	難降佛已降
是故汝今日	當捨貪恚癡	已沒苦淤泥



不捨轉更增	彼象聞佛說	醉解心即悟
身心得安樂	如渴飲甘露	象已受佛化
國人悉歡喜	咸歎唱希有	設種種供養
下善轉成中	中善進增上	不信者生信
已信者深固	阿闍世大王	見佛降醉象
心生奇特想	歡喜倍增敬	如來善方便
現種種神力	調伏諸眾生	隨力入正法
舉國修善業	猶如劫初人	彼提婆達兜
為惡自纏縛	先神力飛行	今墮無擇獄

菴摩羅女見佛品第二十二

世尊廣化畢	而生涅槃心	發於王舍城
詣巴連弗邑	到已住於彼	婆吒利支提
彼是摩竭提	邊邑附庸國	主國婆羅門
多聞明經典	瞻相土安危	國之仰觀師
摩竭王遣使	勅告彼仰觀	命起於牢城
以備於強鄰	世尊記彼地	天神所保持
於中起城郭	永固無危亡	仰觀心歡喜
供養佛法僧	佛出彼城門	往詣恒河濱
仰觀深敬佛	名為瞿曇門	恒河側人民
皆出迎世尊	興種種供養	各巖船令渡

世尊以船多 偏受違眾心 卽以神通力  
隱身及大眾 忽從此岸沒 而出於彼岸  
以乘智慧船 廣濟於眾生 緣斯德力故  
濟河不憑舟 恒河側人民 同聲唱奇特  
咸言名此津 名爲瞿曇津 城門瞿曇門  
津名瞿曇津 斯名流於世 歷代共稱傳  
如來復前行 至彼鳩黎村 說法多所化  
復至那提村 人民多疫死 親戚悉來問  
諸親疫死者 命終生何所 佛善知業報  
悉隨問記說 前至鞞舍離 住於菴羅林

彼菴摩羅女 承佛詣其園 侍女眾隨從  
庠序出奉迎 善執諸情根 身服輕素衣  
捨離莊嚴服 息沐浴香華 猶世貞賢女  
潔素以祠天 端正妙容姿 猶天玉女形  
佛遙見女來 告諸比丘眾 此女極端正  
能留行者情 汝等當正念 以慧鎮其心  
寧在暴虎口 狂夫利劍下 不於女人所  
而起愛欲情 女人顯姿態 若行住坐卧  
乃至畫像形 悉表妖冶容 劫奪人善心  
如何不自防 見啼笑喜怒 縱體而垂肩

或散髮髻傾	猶尙亂人心	況復飾容儀
以顯妙姿顏	莊嚴隱陋形	誘誑於愚夫
迷亂生惡想	不覺醜穢形	當觀無常苦
不淨無我所	諦見其真實	滅除貪欲想
正觀於自境	天女尙不樂	況復人間欲
而能留人心	當執精進弓	智慧鋒利箭
被正念重鎧	決戰於五欲	寧以熱鐵槍
貫徹於雙目	不以愛欲心	而觀於女色
愛欲迷其心	眩惑於女色	亂想而命終
必墮三惡道	畏彼惡道苦	不受女人欺

根不繫境界	境界不繫根	於中貪欲想
由根繫境界	猶如二耕牛	同一軛一鞅
牛不轉相縛	根境界亦然	是故當制心
勿令其放逸	佛為諸比丘	種種說法已
彼菴摩羅女	漸至世尊前	見佛坐樹下
禪定靜思惟	念佛大悲心	哀受我樹林
端心斂儀容	正素妖冶情	恭形心純備
稽首接足禮	世尊命令坐	隨心為說法
汝心已純靜	表徹外德容	壯年豐財寶
備德兼姿顏	能信樂正法	是則世之難

丈夫宿智慧	樂法非為奇	女人情志弱
智淺愛欲深	而能樂正法	此亦為甚難
人生於世間	惟應法自娛	財色非常保
惟正法為珍	強梁病所壞	少壯老所遷
命為死所困	行法無能侵	所愛莫不離
不愛而強鄰	所求不隨意	惟法為從心
他力為大苦	自在力為歡	女人悉由他
兼懷他子苦	是故當思惟	厭離於女身
彼菴摩羅女	聞法心歡喜	堅固智增明
能斷於愛欲	即自厭女身	不染於境界

雖恥於陋形	法力勸其心	稽首而白佛
已蒙尊攝受	哀受明供養	令滿其志願
佛知彼誠心	兼利諸羣生	默然受其請
令即隨歡喜	親聽轉增明	作禮而還家

佛所行讚經卷第四

音釋

驃 毗召切 驃 卑遙切 嵐 盧含切 檝 音接短 栴 如之切  
切 驃 旋風也 嵐 山氣也 檝 棹也 栴 本名也  
 颺 颺戶切 颺 颺暴風也 眩 熒絹切 憤亂也

佛所行讚經卷第五

馬 鳴

菩薩

薩 撰

北涼天竺三藏曇無讖譯

神力住壽品第二十三

爾時鞞舍離 諸離車長者 聞世尊入國

住菴摩羅園 有乘素車輿 素蓋素衣服

青赤黃綠色 其眾各異儀 羽從前後導

爭塗競路前 天冠袞華服 寶飾以莊嚴

威容盛明曜 增暉彼園林 除捨五威儀

下車而步進 息慢而形恭 頂禮於佛足

大眾圍繞佛	如日重輪光	離車名師子
為諸離車長	德貌如師子	位居師子臣
滅除師子慢	受誨釋師子	汝等大威德
名族美色容	能除世憍慢	受法以增明
財色香華飾	不如戒莊嚴	國土豐安樂
惟以汝等榮	榮身而安民	在於調御心
加以樂法情	令德轉崇高	非薄土羣類
而能集眾賢	當日新其德	攝養於萬民
導眾以明正	如牛王涉津	若人能自念
今世及後世	惟當修正戒	福利二世安

為眾所敬重 名稱普流聞 仁者樂為友

德流永無疆 山林寶玉石 皆依地而生

戒德亦如地 眾善之所由 無翅欲騰虛

度河無良舟 人而無戒德 濟苦為實難

如樹美華果 針刺難可攀 多聞美色力

破戒者亦然 端坐勝堂閣 王心自莊嚴

淨戒功德見 隨大仙而化 染衣服毛羽

螺髻剃鬚髮 不修於戒德 方涉眾苦難

日夜三沐浴 奉火修苦行 遺身穢野獸

赴水火投巖 食果餌草根 吸風飲恒水

服氣以絕糧 遠離於正戒 習斯禽獸道  
非爲正法器 毀戒招誹謗 仁者所不親  
心常懷恐怖 惡名而影隨 現世無利益  
後世豈獲安 是故智慧士 當修於淨戒  
於生死曠野 戒爲善導師 持戒由自力  
此則不爲難 淨戒爲梯陞 令人上昇天  
建立淨戒者 斯由煩惱微 諸過壞其心  
喪失善功德 先當離我所 我所覆諸善  
猶灰覆火上 足蹈而覺燒 憍慢覆其心  
如日隱重雲 慢怠滅慚愧 憂悲弱強志

老病壞壯容 我慢滅諸善 諸天阿修羅  
貪嫉興諍訟 喪失諸功德 悉由我慢壞  
我於勝中勝 我德勝者同 我於勝小劣  
斯則爲愚夫 色族悉非常 動搖不暫安  
終爲磨滅法 何用憍慢爲 貪欲爲巨患  
詐親而密怨 猛火從內發 貪火亦復然  
貪欲之熾然 甚於世間火 火盛水能滅  
貪愛難可銷 猛火焚曠野 草盡還復生  
貪欲火焚心 正法生則難 貪欲求世樂  
樂增不淨業 惡業墮惡道 怨無過貪欲

貪則生於愛	愛則習諸欲	習欲招眾苦
尤惡無過貪	貪則為大病	智藥愚夫止
邪覺不正思	能令貪欲增	無常苦不淨
無我無我所	智慧真實觀	能滅彼邪貪
是故於境界	當修真實觀	真實觀已生
貪欲得解脫	見德生貪欲	見過起瞋恚
德過二俱亡	貪恚得除滅	瞋恚改素容
能壞端正色	瞋恚翳明目	害法義欲聞
斷絕親愛義	為世所輕賤	是故當捨恚
勿隨於瞋心	能制狂恚心	是名善御者

世稱善調馴 是為攝繩客 縱恚不息焚

憂悔火隨燒 若人起瞋恚 先自燒其心

然後加於風 或燒或不燒 生老病死苦

逼迫於眾生 復加於恚害 多怨復增怨

見世眾苦迫 應起慈悲心 眾生起煩惱

增微無量差 如來善方便 隨病而略說

譬如世良醫 隨病而投藥 爾時諸離車

聞佛所說法 即起禮佛足 歡喜而頂受

請佛及大眾 明日設薄供 佛告諸離車

菴摩羅已請 離車懷感愧 彼何奪我利



知佛心平等 而復隨喜心 如來善隨宜

安慰令心悅 伏化純熟歸 如蛇被嚴呪

夜過明相生 佛與大眾俱 詣菴摩羅舍

受彼供養畢 往詣毘紐村 於彼夏安居

三月安居竟 復還鞞舍離 住獼猴池側

坐於林樹間 普放大光明 以感魔波旬

來詣於佛所 合掌勸請言 昔尼連禪側

已發真實要 我所作事畢 當入於涅槃

今所作已作 當遂於本心 時佛告波旬

滅度時不遠 却後三月滿 當入於涅槃

時魔知如來 滅度已有期 情願既已滿

歡喜還天宮 如來坐樹下 正受三摩提

放捨業報壽 神力住命存 以如來捨壽

大地皆震動 十方虛空境 周徧大火然

須彌頂崩頽 天雨飛礫石 狂風四激起

樹木悉摧折 天樂發哀聲 天人心忘歡

佛從三昧起 普告諸眾生 我今已捨壽

三昧力存身 身如朽敗車 無復往來因

已脫於三有 如鳥破卵生

離車辭別品第二十四

尊者阿難陀	見地普大動	心驚身毛豎
問佛何因緣	佛告阿難陀	我住三月壽
餘命行悉捨	是故地大動	阿難聞佛教
悲感淚交流	猶如大力象	搖彼梅檀樹
擾動理迫迨	香汁淚流下	親重大師尊
恩深未離欲	惟此四事故	悲苦不自勝
今我聞世尊	涅槃決定教	舉體悉萎銷
迷方失常韻	所聞法悉忘	荒悸忘天地
怪哉救世主	滅度一何駛	遭寒冰垂死
遇火忽復滅	於煩惱曠野	迷亂失其方

忽遇善導師	未度忽復失	如人涉長塗
熱竭久乏水	忽遇清涼池	奔趣悉枯竭
紺睫瞪睛目	明鑒於三世	智慧照幽冥
昏冥一何速	猶如旱地苗	雲興仰希雨
暴風雲速滅	望絕守空田	無智大闇冥
羣生悉迷方	如來然慧燈	忽滅何由出
佛聞阿難說	酸訴情悲切	軟語安慰言
為說真實法	若人知自性	不應處憂悲
一切諸有為	悉皆磨滅法	我已為汝說
合會性別離	恩愛理不常	當捨悲戀心

有為流動法	生滅不自存	欲令長存者
終無有是處	有為若常存	無有遷變者
此則為解脫	於何而更求	汝及餘眾生
今於我何求	汝等所應得	我已為說竟
何用我此身	妙法身長存	我住我寂靜
所要唯在此	然我於眾生	未曾有師拳
當修厭離想	善住於自洲	當知自洲者
專精勤方便	獨靜修閑居	不從於他信
當知法洲者	決定明慧燈	能滅除癡闇
觀察四境界	逮得於勝法	離我離我所

骨竿皮肉塗	血澆以筋纏	諦觀悉不淨
云何樂此身	諸受從緣生	猶如水上泡
生滅無常苦	遠離於樂想	心識生住滅
新新不暫停	思惟於寂滅	常想永已乖
眾行因緣起	聚散不常俱	愚癡生我想
慧者無我所	於此四境界	思惟正觀察
此則一乘道	眾苦悉皆滅	若能住於此
真實正觀者	佛身之存亡	此法常無盡
佛說此妙法	安慰阿難時	諸離車聞之
惶怖咸來集	悉捨俗威儀	驅馳至佛所

禮畢一面坐	欲問不能宣	佛已知其心
逆為方便說	我今觀察汝	心有異常想
放捨俗緣務	惟念法為情	汝今欲從我
所聞所知者	於我存亡際	慎莫生憂悲
無常有為性	躁動變易法	不堅非利益
無有久住相	古昔諸仙王	婆私吒仙等
曼陀轉輪王	其比亦眾多	如是諸先勝
力如自在天	悉已久磨滅	無一存于今
日月天帝釋	其數亦甚眾	悉皆歸磨滅
無有長存者	過去世諸佛	數如恒邊沙

智慧照世間	悉皆如燈滅	未來世諸佛
將滅亦復然	今我豈獨異	當入於涅槃
彼有應度者	今宜進前行	毘舍離快樂
汝等且自安	世間無依怙	三界不足歡
當止憂悲苦	而生離欲心	決斷長別已
而遊於北方	靡靡涉長路	如日傍西山
爾時諸離車	悲吟逐路隨	仰天而哀歎
嗚呼何怪哉	形如真金山	眾相具莊嚴
不久將崩壞	無常何無慈	生死久虛竭
如來智慧母	而今頓放捨	無救苦奈何

眾生久闇冥 假明慧以行 如何智慧日  
忽然而潛光 無知爲迅流 漂浪諸眾生  
如何法橋梁 一旦忽然摧 慈悲大醫王  
無上智良藥 療治眾生苦 如何忽遠逝  
慈悲妙天幢 智慧以莊嚴 金剛心絞絡  
世間觀無厭 祠祀嚴勝幢 云何一旦崩  
眾生何薄福 輪迴生死流 解脫門忽閉  
長苦無出期 如來善安慰 割情而長辭  
制心忍悲戀 如萎迦尼華 徘徊而遲遲  
悵快隨路行 如人喪其親 葬畢長訣還

般涅槃品第二十五

佛至涅槃處 鞞舍離空虛 猶如夜雲冥  
星月失光明 國土先安樂 而今頓凋悴  
猶如喪慈父 孤女常獨悲 如端正無聞  
聰明而薄福 心辯而口吃 明慧而乏才  
神通無威儀 慈悲心虛僞 高勝而無力  
威儀而無法 鞞舍離亦然 素榮而今悴  
猶如秋田苗 失水悉枯萎 或斷火滅烟  
或對食忘餐 悉廢公私業 不修諸俗緣  
念佛感恩深 默默各不言 時師子離車

強忍其憂悲	垂泣發哀聲	以表眷戀心
破壞諸邪徑	顯示於正法	已降諸外道
遂往不復還	世絕離世道	無常為大病
世尊入大寂	無依無有救	方便最勝尊
潛光究竟處	我等失強志	如火絕其薪
世尊捨世蔭	羣生甚可悲	如人失神力
舉世共哀之	逃暑投涼池	遭寒以憑火
一旦悉廓然	羣生何所寄	通達殊勝法
為世陶鑄師	世間失宰主	人喪道則亡
老病死自在	正道喪非道通	能壞大苦機

世間何有雙	猛熱極燄盛	大雲雨令銷
貪欲火熾然	其誰能令滅	堅固能譬者
已捨世間住	復何智慧力	能為不請友
如彼臨刑囚	為死而醉酒	眾生迷惑識
惟為死受生	利鋸以解材	無常解世間
癡闇為深水	欲愛為巨浪	煩惱為浮沫
邪見摩竭魚	惟有智慧船	能度斯大海
眾病為樹華	衰老為纖條	死為樹深根
有業為其芽	智慧剛利刀	能斷三有樹
無明為鑽燧	貪欲為熾燄	五欲境界薪

滅之以智水 具足殊勝法 已壞於癡冥

見安隱正路 究竟諸煩惱 慈悲化眾生

怨親無異想 一切智通達 而今悉棄捨

輒美清淨音 方身纖長臂 大仙而有邊

何人得無窮 當覺時遷速 應勤求正法

如險道遇水 時飲速進路 非常甚暴逆

普壞無貴賤 正觀存于心 雖眠亦常覺

時離車師子 常念佛智慧 厭離於生死

歎慕人師子 不存世恩愛 深崇離欲德

折伏輕躁意 棲心寂靜處 勤修行惠施

遠離於憍慢 樂獨修閑居 思惟真實法

爾時一切智 圓身師子顧 瞻彼鞞舍離

而說長辭偈 是吾之最後 遊此鞞舍離

住力士生地 當入於涅槃 漸次第行遊

至彼蒲伽城 安住堅固林 教誡諸比丘

吾今已昇天 當入於涅槃 汝等當依法

是則尊勝處 不人修多羅 亦不順律儀

真實義相違 則不應攝受 非法亦非律

又非我所說 是則為闇說 汝等應速捨

執受於明說 是則非顛倒 是則我所說

如法如律教 如我法律受 是則爲可信  
言我法律非 是則不可信 不解細微義  
謬隨於文字 是則爲愚夫 非法而妄說  
不別其真偽 無見而闇受 猶踰金共肆  
誑惑於世間 愚夫習淺智 不解真實義  
受於相似法 而作真法受 是故當審諦  
觀察真法律 猶如鍊金師 燒打而取真  
不知諸經論 是則非智慧 不應說所應  
應作不應見 當作平等受 句義如說行  
執劍無方便 則反傷其手 辭句不巧便

其義難了知 如夜行求室 宅曠莫知處  
失義則忘法 忘法心馳亂 是故智慧士  
不違真實義 說斯教誠已 至於波婆城  
彼諸力士眾 設種種供養 時有長者子  
其名曰純陀 請佛到其舍 供設最後飯  
飯食說法畢 行詣鳩夷城 度於菜蕨河  
及熙連二河 彼有堅固林 安隱閑靜處  
入金河洗浴 身若真金山 告勅阿難陀  
於彼雙樹間 掃灑令清淨 安置於繩牀  
吾今中夜時 當入於涅槃 阿難聞佛教



氣塞而心悲 行泣而奉教 布置訖還白  
如來就繩牀 北首右脅卧 枕手累雙足  
猶如師子王 畢苦後邊身 一卧永不起  
弟子眾圍繞 哀歎世眼滅 風止林流靜  
鳥獸寂無聲 樹木汁淚流 華葉非時零  
未離欲人天 皆悉大惶怖 如人遊曠澤  
道險未至村 但恐行不至 心懼形怱怱  
如來畢竟卧 而告阿難陀 往告諸力士  
我涅槃時至 彼若不見我 永恨生大苦  
阿難受佛教 悲泣而隨路 告彼諸力士

世尊已畢竟 諸力士聞之 極生大恐怖  
士女奔馳出 號泣至佛所 弊衣而散髮  
蒙塵身流汗 號慟詣彼林 猶如天福盡  
垂淚禮佛足 憂悲身萎熟 如來安慰說  
汝等勿憂悴 今應隨喜時 不宜生憂感  
長劫之所規 我今始獲得 已度根境界  
無盡清淨處 離地水火風 寂靜不生滅  
永除於憂患 云何爲我憂 我昔伽闍山  
欲捨於此身 以本因緣故 存世至于今  
守斯危脆身 如毒蛇同居 今入于大寂

眾苦緣已畢	不復更受身	未來苦長息
汝等不復應	為我生恐怖	力士聞佛說
入於大寂靜	心亂而目冥	如觀大黑闇
合掌白佛言	佛離生死苦	永之寂滅樂
我等實欣慶	猶如被燒舍	親從盛火出
諸天猶歡喜	何況于世人	如來既滅後
羣生無所覩	永違於救護	是故生憂悲
譬如商人眾	遠涉於曠野	惟有一導師
忽然中道亡	大眾無所怙	云何不憂悲
現世自證知	觀一切知見	而不獲勝利

舉世所應笑	譬如經寶山	愚癡守貧苦
如是諸力士	向佛而悲訴	猶如人一子
悲訴於慈父	佛以善誘辭	顯示第一義
告諸力士眾	誠如汝所言	求道須精勤
非但見我得	如我所說行	得離眾苦網
行道存于心	不必由見我	猶如疾病人
依方服良藥	眾病自然除	不待見醫師
不如我說行	空見我無益	雖與我相遠
行法為近我	同止不隨法	當知去我遠
攝心莫放逸	精勤修正業	人生於世間

長夜眾苦迫 擾動不自安 猶若風中燈  
時諸力士眾 聞佛慈悲教 內感而拔淚  
強自抑止歸

大般涅槃品第二十六

爾時有梵志 名須跋陀羅 賢德悉備足  
淨戒護眾生 少稟於邪見 隨外道出家  
欲來見世尊 告語阿難陀 我聞如來道  
厥義深難測 世間無上覺 第一調御師  
今欲般涅槃 難復可再遇 難見見者難  
猶如鏡中月 我今欲奉見 無上善導師

為求絕眾苦 度生死彼岸 佛日欲潛光  
願令我暫見 阿難情悲感 兼謂為譏論  
或欣世尊滅 不宜令佛見 佛知彼希望  
堪為正法器 而告阿難言 聽彼外道前  
我為度人生 汝勿作留難 須跋陀羅聞  
心生大歡喜 樂法情轉深 加敬至佛前  
應時隨順言 軟語而問訊 和顏合掌請  
今欲有所問 世有知法者 如我比甚多  
惟聞佛所得 解脫異要道 願為我略說  
沾潤虛渴懷 不為論議故 亦無勝負心

佛為彼梵志	略說八正道	聞即虛心受
猶迷得正路	覺知先所學	非為究竟道
即得未曾得	捨離於邪徑	兼背癡闇障
思惟先所習	瞋恚癡冥俱	長養不善業
愛恚癡等行	能起諸善業	多聞慧精進
亦由有愛生	恚癡若斷者	則離於諸業
諸業既已除	是名業解脫	諸業解脫者
不與義相應	世間說一切	悉皆有自性
有愛瞋恚癡	而有自性者	此則應常存
云何而解脫	正使恚癡滅	有愛還復生

如水自性冷	緣火故成熱	熱息歸於冷
以自性常故	常知有愛性	聞慧進不增
不增亦不減	云何是解脫	先謂彼生死
本從性中生	今觀於彼義	無得解脫者
性者則常住	云何有究竟	譬如然明燈
何能令無光	佛道真實義	緣愛生世間
愛滅則寂滅	因滅故果亡	本謂我異身
不見無作者	今聞佛正教	世間無有我
諸法因緣生	無有自在故	因緣生故苦
因緣滅亦然	觀世因緣生	則滅於斷見

緣離世間滅 則離於常見 悉捨本所見

深見佛正法 宿命種善因 聞法能即悟

已得善寂滅 清淨無盡處 心開信增廣

仰瞻如來臥 不忍觀如來 捨世般涅槃

及佛未究竟 我當先滅度 合掌辭聖顏

一面正基坐 捨壽入涅槃 如雨滅小火

佛告諸比丘 我最後弟子 而今已涅槃

汝等當供養 佛以初夜過 月明眾星朗

閑林靜無聲 而興大悲心 遺誠諸弟子

吾般涅槃後 汝等當恭敬 波羅提木叉

卽是汝大師 巨夜之明燈 貧人之大寶

常所教誡者 汝等當隨順 如事我無異

當淨身口行 離諸治生業 田宅畜眾生

積財集五穀 一切當遠離 如避大火坑

墾土截草木 醫療治諸病 仰觀於曆數

推步吉凶象 占相於利害 此悉不應為

節身隨時食 不受使行術 不和合湯藥

遠離諸諂曲 順時資生具 應當知量受

受則不積聚 是則略說戒 為眾戒之本

亦為解脫本 依此法能生 一切諸正受

一切真實智	緣斯得究竟	是故當執持
勿令其斷壞	淨戒不斷故	則有諸善法
無則無諸善	以戒建立故	已住清淨戒
善攝諸情根	猶如善牧牛	不令其縱暴
不攝諸根馬	縱逸於六境	現世致殃禍
將墜於惡道	譬如不調馬	令人墮坑陷
是故明智者	不應縱諸根	諸根甚凶惡
爲人之重怨	眾生愛諸根	還爲彼傷害
深怨盛毒蛇	暴虎及猛火	世間之甚惡
慧者所不畏	惟畏輕躁心	將入入惡道

以彼樂小甜	不觀深嶮故	狂象失利鈎
猿猴得樹林	輕躁心如是	慧者當執持
放心令自在	終不得寂滅	是故當制心
遠之安靜處	飯食知節量	當如服藥法
勿因於飯食	而生貪恚心	飲食止饑渴
如膏朽敗車	譬如蜂採華	不壞其色香
比丘行乞食	勿傷彼信心	若人開心施
當推彼所堪	不籌量牛力	重載令其傷
朝中晡三時	次第修正業	初後二夜分
亦莫著睡眠	中夜端心卧	係念在明相

勿終夜睡眠 令身命空過 時火常燒身

云何長睡眠 煩惱眾怨家 乘虛而隨害

心昏於睡眠 死至孰能覺 毒蛇藏於宅

善咒能令出 黑虻居其心 明覺善咒除

無術而長眠 是則無慚人 慚愧為嚴服

慚為制象鈎 慚愧令心定 無慚喪善根

慚愧世稱賢 無慚禽獸倫 若人以利刀

節節解其身 不應懷恚恨 口不加惡言

惡念而惡言 自傷不害彼 節身修苦行

無過忍辱勝 惟有行忍辱 難伏堅固力

是故勿懷恨 惡言以加人 瞋恚壞正法

亦壞端正色 喪失美名稱 瞋火自燒心

瞋為功德怨 愛德勿懷恨 在家興瞋恚

多惱故非怪 出家而懷瞋 是則與理乖

猶如冷水中 而有盛火然 憍慢心若生

當自手摩頭 剃髮服染衣 手持乞食器

邊生裁自活 何為生憍慢 俗人依色族

憍慢亦為過 何況出家人 志求解脫道

而生憍慢心 此則大不可 曲直性相違

不俱猶霜燄 出家修直道 詔曲非所應

諂偽幻虛詐	惟法不欺誑	多求則為苦
少欲則安樂	為安應少欲	况求真解脫
慳恪畏多求	恐損其財寶	好施者亦畏
愧則不供足	是故當少欲	施彼無畏心
由此少欲心	則得解脫道	若欲求解脫
亦應習知足	知足心常歡	歡喜即是法
資生俱鄙陋	知足故常安	不知足之人
雖得生天樂	以不知足故	苦火常燒心
富而不知足	是亦為貧苦	雖貧而知足
是則第一富	其不知足者	五欲境彌廣

猶更求無厭	長夜馳騁苦	汲汲懷憂慮
反為知足哀	不多受眷屬	其心常安隱
安隱寂靜故	人天悉奉事	是故當捨離
親疏二眷屬	如曠澤孤樹	眾鳥猿猴棲
多畜眾亦然	長夜受眾苦	多眾多纏累
如老象溺泥	若人勤精進	無利而不獲
是故當晝夜	精勤不懈怠	山谷微流水
常流故決石	鑽火不精勤	徒勞而不獲
是故常精進	如壯夫鑽火	善友雖為良
不及於正念	正念存於心	眾惡悉不入



是故修行者	常當念其身	於身若失念
一切善則忘	譬如勇猛將	被甲禦強敵
正念爲重鎧	能制六境賊	正定檢覺心
觀世間生滅	是故修行者	當習三摩提
三昧已寂靜	能滅一切苦	智慧能照明
遠離於攝受	等觀內思惟	隨順趣正法
在家及出家	斯應由此路	生老死大海
智慧爲輕舟	無明大闇冥	智慧爲明燈
諸纏結垢病	智慧爲良藥	煩惱棘刺林
智慧爲利斧	癡愛駛水流	智慧爲橋梁

是故當勤習	聞思修生慧	成就三種慧
雖盲慧眼通	無慧心虛僞	是則非出家
是故當覺知	離諸虛僞法	逮得微妙樂
寂靜安隱處	尊崇不放逸	放逸爲善怨
若人不放逸	得生帝釋處	縱心放逸者
則墮阿修羅	安慰慈悲業	所應我已畢
汝等當精進	善自修其業	山林空閑處
增長寂靜心	當自勤勗勉	勿令後恨悔
猶如世良醫	應病說方藥	抱病而不服
是非良醫過	我已說真實	顯示平等路

聞而不奉用	此非說者咎	於四真諦義
有所不了者	汝今悉應問	勿復隱所懷
世尊哀愍教	眾會默然住	時阿那律陀
觀察諸大眾	默然無所疑	合掌而白佛
月温日光冷	風靜地性動	如是四種惑
世間悉已無	苦集滅道諦	真實未曾違
如世尊所說	眾會悉無疑	惟世尊涅槃
一切悉悲感	不於世尊說	起不究竟想
正使新出家	情未深解者	聞今愍教
疑惑悉已除	已度生死海	無欲無所求

今皆生悲戀

歎佛滅何速

佛以阿那律

種種憂悲說

復以慈愍心

安慰而告言

正使經劫住

終歸當別離

異體而和合

理自不常俱

自他利已畢

空住何所為

天人應度者

悉已得解脫

汝等諸弟子

展轉維正法

知有必磨滅

勿復生憂悲

當自勤方便

到不別離家

我已然智燈

照除世間冥

知世不牢固

汝等當隨喜

如親遭重病

療治脫苦患

已捨於苦器

逆生死海流

永離眾苦患

是亦應隨喜

汝等善自護	勿生於放逸	有者悉歸滅
我今入涅槃	言語從是斷	此則最後教
入初禪三昧	次第九正受	逆次第正受
還入於初禪	復從初禪起	入於第四禪
出定心無寄	便入於涅槃	以佛涅槃故
大地普震動	空中普雨火	無薪而自燄
又復從地起	八方俱熾然	乃至諸天宮
熾然亦如是	雷電動天地	霹靂震山川
猶天阿修羅	擊鼓戰鬪聲	狂風四激起
山崩雨灰塵	日月無光暉	清流悉沸涌

堅固林萎悴	華葉非時零	飛龍乘黑雲
垂五首淚流	四王及眷屬	含悲興供養
淨居天來下	虛空中列侍	觀察無常變
不憂亦不喜	歎世違天師	泯滅一何速
八部諸天神	徧滿虛空中	散華以供養
感感心不歡	惟有魔王喜	奏樂以自娛
閻浮提失榮	猶山頽嶺崩	大象素牙折
牛王雙角摧	虛空無日月	蓮華遭嚴霜
如來般涅槃	世間悴亦然	

歎涅槃品第二十七

時有一天子 乘千白鵠宮 於上虛空中

觀佛般涅槃 普為諸天眾 廣說無常偈

一切性無常 速生亦速滅 生則與苦俱

惟寂滅為樂 行業薪積聚 智慧火熾然

名稱烟衝天 時雨雨令滅 猶如劫火起

水災之所滅 復有梵仙天 猶第一義仙

處天勝妙樂 而不染天報 歎如來寂滅

心定而口言 觀察三世法 始終無不壞

第一義通達 世間無比士 慧知見之上

救護世間者 悉為無常壞 何人得長存

哀哉舉世間 羣生墮邪徑 時阿那律陀

於世不律陀 已滅不律陀 生死尼律陀

歎如來寂滅 羣生悉盲冥 諸行聚無常

猶如輕雲浮 速起而速滅 慧者不保持

無常金剛杵 壞牟尼仙山 鄙哉世輕躁

破壞不堅固 無常暴師子 害龍象大仙

如來金剛幢 猶為無常壞 何況未離欲

而不生怖畏 六種子一芽 一水之所雨

四引之深根 二觚五種果 三際同一體

煩惱之大樹 牟尼大象拔 而不免無常

佛身不說卷第五  
猶如飾棄鳥 樂水吞毒蛇 忽遇天大旱  
失水而亡身 駿馬勇於戰 戰畢純熟還  
猛火緣薪熾 薪盡則自滅 如來亦如是  
事畢歸涅槃 猶如明月光 普爲世除冥  
眾生悉蒙照 而復隱須彌 如來亦如是  
慧光照幽冥 爲眾生除冥 而隱涅槃山  
名稱勝光明 普照於世間 滅除一切冥  
不停若迅流 善御七駿馬 軍眾羽從遊  
光光日天子 猶入於崦嵫 日月五障翳  
眾生失光明 奉天祠火畢 惟有焦黑烟

如來已潛暉 世失榮亦然 絕恩愛希望  
普應眾生望 眾生望已滿 事畢絕希望  
離煩惱身縛 而得真實道 離羣聚憤亂  
入於寂靜處 神通騰虛遊 苦器故棄捨  
癡冥之重闇 智慧光照除 煩惱之埃塵  
智水洗令淨 不復數數還 永之寂靜處  
滅一切生死 一切悉崇敬 令一切樂法  
以慧充一切 悉安慰一切 一切德普流  
名聞遍一切 重照迄于今 諸有競德者  
於彼哀愍心 四利爲不欣 四衰不以感

善攝於諸情	諸根悉明徹	澄心平等觀
六境不染著	所得未曾得	得人所得不得
以諸出要水	虛渴令飽滿	施人所不施
亦不望其報	寂靜妙相身	悉知一切念
好惡不傾動	力勝一切怨	一切病良藥
而為無常壞	一切眾生類	樂法各異端
普應其所求	悉滿其所願	聖慧大施主
一往不復還	猶若世猛火	薪盡不復然
八法所不染	降五難調羣	以三而見三
離三而成三	藏一而得一	超七而長眠

究竟寂滅道	賢聖之所宗	已斷煩惱障
宗奉者已度	饑虛渴乏者	飲之以甘露
被忍辱重鎧	降伏諸恚怒	勝法微妙義
以悅於眾心	修世界善者	植以聖種子
習正不正者	等攝而不捨	轉無上法輪
普世歡喜受	宿植樂法因	斯皆得解脫
遊行於人間	度諸未度者	未見真實者
悉令見真實	諸習外道者	授之以深法
說生死無常	無主無有樂	建大名稱幢
破壞眾魔軍	進却無欣感	薄生歎寂滅

未度者令度 未脫者令脫 未寂者令寂  
未覺者令覺 牟尼寂靜道 以攝於眾生  
眾生違聖道 習諸不正業 猶若大劫盡  
持法者長眠 密雲震霹靂 摧林雨甘露  
少象摧棘林 識養能利人 雲離象老悴  
斯皆無所堪 破見能成見 於度世而度  
已壞諸邪論 而得自在道 今入於大寂  
世間無救護 魔王大軍眾 奮武震天地  
欲害牟尼尊 不能令傾動 如何忽一朝  
非常魔所壞 天人普雲集 充滿虛空中

畏無窮生死 心生大憂怖 世間無遠近  
天眼悉照見 業報諦明了 如觀鏡中像  
天耳勝聰達 無遠而不聞 騰虛教諸天  
遊步化人境 分身而合體 涉水而不輒  
憶念過去生 彌劫而不忘 諸根遊境界  
彼彼各異念 知他心通智 一切皆悉知  
神通淨妙智 平等觀一切 悉盡一切漏  
一切事已畢 智捨有餘界 息智而長眠  
眾生剛強心 見則得柔輒 鈍根諸眾生  
見則慧明利 無量惡業過 見各得通塗

一旦忽長眠

誰復顯斯德

世間無救護

望斷氣息絕

誰以清涼水

灑之令蘇息

所作自事畢

大悲已長息

世間愚癡網

誰當爲裂壞

向生死迅流

誰當說令返

羣生癡惑心

誰說寂靜道

誰示安隱處

誰顯真實義

眾生受大苦

誰爲慈父救

猶多誦悉忘

馬易土失威

王者亡失國

世無佛亦然

多聞無辭辯

爲醫而無慧

人王失光相

佛滅俗失榮

良駟失善御

乘舟失船師

三軍失英將

商人失其導

疾病失良醫

聖王失七寶

眾星失明月

愛壽而失命

世間亦如是

佛滅失大師

如是阿羅漢

所作皆已畢

諸漏悉已盡

知恩報恩故

纏綿悲戀說

歎德陳世苦

諸未離欲者

悲泣不自勝

其諸漏盡者

惟歎生滅苦

時諸力士眾

聞佛已涅槃

亂聲慟悲泣

如羣鵠遇鷹

悉來詣雙樹

覩如來長眠

無復覺悟容

搥胸而呼天

猶師子搏犢

羣牛亂呼聲

中有一力士

心已樂正法

諦觀聖法王

已入於大寂



言眾生悉眠 佛開發令覺 今入於大寂

畢竟而長眠 為眾建法幢 而今一旦崩

如來智慧日 大覺為照明 精進為炎熱

智慧曜千光 滅除一切闇 如何復長冥

一慧照三世 普為眾生眼 而今忽然盲

舉世莫知路 生死大河流 貪恚癡巨浪

法橋一旦崩 眾生長沒溺 彼諸力士眾

或悲泣號咷 或密感無聲 或投身躄地

或寂默禪思 或煩惋長吟 辦金銀寶輿

香華具莊嚴 安置如來身 寶帳覆其上

具幢幡華蓋 種種諸妓樂 諸力士男女

導從隨供養 諸天散香華 空中鼓天樂

人天一悲歎 聲合而同哀 入城見士女

長幼供養畢 出於龍象門 度熙連河表

到諸過去佛 滅度支提所 積牛頭栴檀

及諸名香木 置佛身於上 灌以眾香油

以火燒其下 三燒而不然 時彼大迦葉

先住王舍城 知佛欲涅槃 眷屬從彼來

淨心發妙願 願見世尊身 以彼誠願故

火滅而不然 迦葉眷屬至 悲歎俱瞻顏

敬禮於雙足 然後火乃然 內絕煩惱火  
外火不能燒 雖燒外皮肉 金剛真骨存  
香油悉燒盡 盛骨以金瓶 如法界不盡  
骨不盡亦然 金剛智慧果 難動如須彌  
大力金翅鳥 所不能傾移 而處於寶瓶  
應世而流遷 奇哉世間力 能轉寂滅法  
德稱廣流布 周流於十方 隨世長寂滅  
惟有餘骨存 大光曜天下 羣生悉蒙照  
一旦而潛暉 遺骨於瓶中 金剛利智慧  
壞煩惱苦山 眾苦集其身 金剛志能安

受大苦眾生 悉令得除滅 如是金剛體  
今爲火所焚 彼諸力士眾 勇健世無雙  
摧伏怨家苦 能救苦歸依 親愛遭苦難  
志强能無憂 今見如來滅 悉懷憂悲心  
壯士氣強盛 憍慢虛天步 憂苦迫其身  
入城猶曠澤 持舍利入城 巷路普供養  
置於高樓閣 人天悉奉事 來詣觀供養  
分舍利品第二十八

彼諸力士眾 奉事於舍利 以妙勝香華  
興無上供養 時七國諸王 承佛已滅度

遣使詣力士 請求佛舍利 彼諸力士眾  
敬重如來身 兼恃其勇健 而起憍慢心  
舍 寧捨自身命 不捨佛舍利 彼使悉空還  
七王大忿恨 興軍如雲雨 來詣鳩夷城  
人民出城者 皆悉驚怖還 告諸力士眾  
諸國軍馬來 象馬車步眾 圍繞鳩夷城  
城外諸園林 泉池華果樹 軍眾悉踐踏  
榮觀悉摧碎 力士登城觀 生業悉破壞  
嚴備戰鬪具 以擬於外敵 弓弩礮石車  
飛炬悉發來 七王圍繞城 軍眾各精銳

羽儀盛明顯 猶如七曙光 鐘鼓若雷霆  
勇氣盛雲霧 力士大奮怒 開門而命敵  
長宿諸士女 心信佛法者 驚怖發誠願  
伏彼而不害 隨親相勸諫 不欲令鬪戰  
勇士被重甲 揮戈舞長劍 鐘鼓而亂鳴  
執仗鋒未交 有一婆羅門 名曰獨樓那  
多聞智略勝 謙虛眾所宗 慈心樂正法  
告彼諸王言 觀彼城形勢 一人亦足當  
况復齊心力 而不能伏彼 正使相摧滅  
復有何德稱 利鋒刃既交 勢無有兩全

因此而害彼 二俱有所傷 戰鬪多機變  
形勢難測量 或有強勝弱 或弱而勝強  
健夫輕毒蛇 豈不傷其身 有人性柔弱  
羣女子所獎 臨陣成戰士 如火得膏油  
鬪莫輕弱敵 謂彼無所堪 身力不足恃  
不如法力強 古昔有勝王 名迦蘭陀摩  
端坐起慈心 能伏其怨敵 雖王四天下  
名稱財利豐 終歸亦皆盡 如牛飲飽歸  
應以法以義 應以和方便 戰勝增其怨  
和勝後無患 今結飲血誓 此事甚不可

爲欲供養佛 應隨佛忍辱 如是婆羅門  
決定吐誠實 方宜義和理 而作無畏說  
爾時彼諸王 告婆羅門言 汝今善應時  
黠慧義饒益 親密至誠言 順法依強理  
且聽我所說 爲王者之法 或因五欲事  
嫌恨競強力 或因其嬉戲 不急致鬪諍  
吾等今爲法 戰諍有何怪 驕慢而違義  
世人尙伏從 况佛離驕慢 化人令謙下  
我等而不能 亡身而供養 昔諸大地主  
彌瑟糝難陀 爲一端正女 戰諍相摧殘

沉今爲供養 寂靜離欲師 愛身而惜命  
不以力爭求 先王驕羅婆 與般那婆戰  
展轉更相破 正爲貪利故 況爲無貪師  
而復貪其生 羅摩仙人子 瞋恨千臂王  
破國殺人民 正爲瞋恚故 況爲無恚師  
而惜於身命 羅摩爲私陀 殺害諸鬼神  
況天攝受師 不爲其沒命 阿黎及婆俱  
二鬼常結怨 正爲愚癡故 廣害於眾生  
況爲智慧師 而復惜命身 如是比眾多  
無義而自喪 況今天人師 普世所恭敬

計身而惜命 不勤求供養 汝若欲止諍  
爲吾等入城 勸彼令開解 使我願得滿  
以汝法言故 令我心小息 猶如盛恚蛇  
咒力故暫止 爾時婆羅門 受彼諸王教  
入城詣力士 問訊以告誠 外諸人中王  
手執利器仗 身被於重甲 精銳曜日光  
奮師子勇氣 咸欲滅此城 然其爲法故  
猶畏非法行 是故遣我來 旨欲有所曰  
我不爲土地 亦不求錢財 不以憍慢故  
亦無懷恨心 恭敬大仙故 而來至於此

汝等知我心	何為苦相違	尊奉彼我同
則為法兄弟	世尊之遺靈	一心共供養
慳惜於錢財	此則大非道	法慳過最甚
普世之所薄	決定不通者	當修待賓法
無有利利法	閉門而自防	彼等悉如是
告此吉凶法	我今私所懷	亦告其誠實
莫彼此相違	理應共和合	世尊在於世
常以忍辱力	不順於聖教	云何名供養
世人以五欲	財利田宅諍	若為正法者
應隨順聖理	為法而結怨	此則理相違

佛寂靜慈悲	常欲安一切	供養於大悲
而興於大害	應等分舍利	普令得供養
順法名稱流	義通理則宜	若彼非法行
當以法和之	是則為樂法	令法得久住
佛說一切施	法施為最勝	人斯行財施
行法施者難	力士聞此說	內愧互相視
報彼梵志言	深感汝來意	親善順法言
和理雅正說	梵志之所應	隨順自功德
善和彼此諍	示我以要道	如制迷途馬
還復於正路	今當用和理	從汝之所說

誠言而不顧	後必生悔恨	卽開佛舍利
等分爲八分	自供養一分	七分付梵志
七王得舍利	歡喜而頂受	持歸還自國
起塔加供養	梵志求力士	得分舍利瓶
又從彼七王	求分第八分	持歸起支提
號名金瓶塔	俱夷那竭人	聚集餘灰炭
而起一支提	名曰灰炭塔	八王起八塔
金瓶及灰炭	如是閻浮提	始起於十塔
舉國諸士女	悉持寶華蓋	隨塔而供養
莊嚴若金山	種種諸妓樂	晝夜長讚歎

時五百羅漢	永失大師蔭	惟然無所恃
還者闍崛山	集彼帝釋巖	結集諸經藏
一切皆共推	長老阿難陀	如來前後說
巨細汝悉聞	鞞提醯牟尼	當爲大眾說
阿難大眾中	昇於師子座	如佛說所說
稱如是我聞	合座悉流涕	感此我聞聲
如法如其時	如處如其人	隨說而筆受
究竟成經藏	勤方便修學	悉已得涅槃
今得及當得	涅槃亦復然	無憂王出世
强者能令憂	劣者爲除憂	如無憂華樹

王於閻浮提 心常無以憂 深信於正法  
故號無憂王 孔雀之苗裔 稟正性而生  
普濟於天下 兼起諸塔廟 本字強無憂  
今名法無憂 開彼七王塔 以取於舍利  
分布一日起 八萬四千塔 惟有第八塔  
在於羅摩村 神龍所守護 王取不能得  
雖不得舍利 知佛有遺靈 神龍所供養  
增其信敬心 雖王領國土 逮得初聖果  
能令普天下 供養如來塔 去來今現在  
悉皆得解脫 如來現在世 涅槃及舍利

恭敬供養者 其福等無異 明慧增上心  
深察如來德 懷道興供養 其福亦復勝  
佛得尊勝法 應受一切供 已到不死處  
信者亦隨安 是故諸天人 悉應當供養  
第一大慈悲 通達第一義 度一切眾生  
孰聞而不感 生老病死苦 世間苦無過  
死苦苦之大 諸天之所畏 永離二種苦  
云何不供養 不受後有樂 世間樂無上  
增生苦之大 世間苦無比 佛得離生苦  
不受後有樂 爲世廣顯示 如何不供養



讚諸牟尼尊 始終之所行 不自顯知見  
亦不求名稱 隨順佛經說 以濟諸世間

佛所行讚經卷第五

音釋

拔亡粉礮匹見糝女救弼皮筆

論音亦謂安 具前前天人 漸顯前好養  
論音亦謂安 具前前天人 漸顯前好養  
論音亦謂安 具前前天人 漸顯前好養  
論音亦謂安 具前前天人 漸顯前好養  
論音亦謂安 具前前天人 漸顯前好養  
論音亦謂安 具前前天人 漸顯前好養  
論音亦謂安 具前前天人 漸顯前好養  
論音亦謂安 具前前天人 漸顯前好養  
論音亦謂安 具前前天人 漸顯前好養  
論音亦謂安 具前前天人 漸顯前好養





